

四庫全書

史部

欽定四庫全書

史部

文獻通考卷

二百九十九  
二百

詳校官內閣學士<sub>臣</sub>瑞保

編修<sub>臣</sub>程嘉謨覆勘

覆校官中書<sub>臣</sub>孫希旦

校對官中書<sub>臣</sub>王彞憲

謄錄監生<sub>臣</sub>戴祖覃

欽定四庫全書

文獻通考卷一百九十九

鄱陽馬端臨貴與著

經籍考二十六

史傳記

魏公語錄一卷

陳氏曰與別錄小異而實同別錄分四卷此總為一篇先後次第亦不同而末一則別錄所無姑並

存之

魏公別錄四卷

鼂氏曰其門人王巖叟記其言論事實然以國史考之其歲月往往抵牾蓋失之誣也

杜祁公語錄一卷

陳氏曰不知何人作

文潞公私記一卷

鼂氏曰皇朝文彥博所撰元豐初王堯臣之子同

老以其父至和中所撰立英宗為皇子詔草上之  
且曰時宰相文彥博富弼知狀神宗以問彥博彥  
博具以實對至元祐中賈易為言官為韓忠彥爭  
辨其事彥博乃著此其後云自古惟霍禹云縣官  
非我家將軍不得至此楊復恭自稱定策國老謂  
昭宗為門生天子鞅鞅不道之言卒被夷滅  
陳氏曰記至和請建儲及元豐褒賞事

潛德錄一卷

鼂氏曰皇朝呂誨獻可之孫撰記其祖乞立英宗

言章

嘉祐名臣傳五卷

鼂氏曰張唐英傳仁宗朝賢臣五十餘人

王氏揮麈錄曰唐英天覺同胞兄仕至殿中侍御

史嘗述仁宗政要上於朝所謂嘉祐名臣傳特政

要中一門耳

孔子編年三卷

鼂氏曰皇朝孔傳取左氏國語公羊史記及他書  
所載孔子事以年次之自生至卒

東家雜記二卷

鼂氏曰亦孔傳撰孔子四十七代孫也纂其家舊  
聞軼事於此書

陳氏曰歷代追崇先聖故事及孔林古跡

鼂以道揚雄別傳一卷

鼂氏曰從父詹事公撰雜取諸書所載雄逸事為

一編係之以贊

唐質肅遺事一卷

陳氏曰無名氏所記唐介子方事也

韓莊敏遺事一卷

陳氏曰祕書丞韓宗武文若撰記其父丞相縝王  
汝事末亦雜載他事宗武即少年遇洋客者也年  
八十二乃卒此編亦載其詩云熙寧間得異疾與  
神物遇



范忠宣言行錄二十卷

陳氏曰不著名氏其家所錄也

范太史遺事一卷

陳氏曰翰林學士范冲元長記其父事

傅獻簡佳語一卷

陳氏曰不知何人所作記傅堯俞所談

杜公談錄一卷

陳氏曰雷繹杜師益等錄其父務滋之言王廣淵

作序

豐清敏遺事一卷

陳氏曰給事中章貢李朴先之撰記豐稷相之事  
朱熹為之後序

宗忠簡公遺事三卷

陳氏曰不著名氏錄留守開封事亦其家子孫所  
為

後村劉氏序曰公遺事行世已久今連帥寶謨王

公鎔公之外孫復稍採摭舊聞以傳翼之

呂忠穆家傳一卷 逢辰記一卷 遺事一卷

陳氏日記建炎丞相呂頤浩元直事孫昭問刻之  
廣德軍

褒德集二卷 易學辨惑一卷

陳氏曰邵伯溫撰錄其父告命諡議行狀墓誌之  
屬辯惑述傳授源流辯鄭夬之妄

呂氏家塾記一卷

陳氏曰侍講呂希哲原明撰

桐陰舊話十卷

陳氏曰吏部尚書潁川韓元吉無咎撰記其家世舊事以京師第門有桐木故云元吉門下侍郎維之四世孫也

趙康靖日記一卷

陳氏曰參政睢陽趙槩叔平所記治平乙巳丙午間在政路初事

劉忠肅公行年記一卷

陳氏曰丞相東平劉摯莘老撰

文昌雜錄六卷

陳氏曰主客郎中南京龐元英懋賢撰官制初行  
元英為郎在省四年記一時見聞及古今典故可  
觀覽元英丞相莊敏公籍之子

聞見近錄一卷

陳氏曰宗正丞三槐王鞏定國撰

辯欺錄一卷

陳氏曰韓忠彥記其父嘉祐末命事與文富諸公

辯

回天錄一卷

陳氏曰宣教郎秦湛處度撰記呂好問圍城中事

好問除右丞訓詞有回天之力語故以名錄後有

好問謝其祖公著復官表及遺表

盡忠補過錄一卷

陳氏曰修職郎穆伯芻撰記張孝純在偽齊時所  
上本朝書

吳丞相手錄一卷

陳氏曰吳敏元忠撰記靖康初元事

岳飛事實六卷辯誣五卷

陳氏曰飛之孫珂撰

丁卯實編一卷

陳氏曰成忠郎李珙撰誅曦之功楊巨源為多安

丙忌而殺之珙為作傳上之於朝以昭其功而申其冤

孔子編年五卷

陳氏曰新安胡仔元任撰其父待制舜陟命仔采摭經傳為之

諸葛武侯傳一卷

陳氏曰侍講張栻撰以陳壽作史私且陋裒集他傳及裴松之所注為此傳而削去管樂自許一則



朱晦翁以為不然又為後論以達其意謂其體正大而學未至使得游洙泗之門所就不止此

韓文公歷官記一卷

陳氏曰新安張敦頤撰頗疏畧其最誤者序言擒吳元濟出牛元翼為一事此大謬也為裴度行軍司馬在憲宗元和時奉使鎮州王庭湊在穆宗長慶時

歐公本末四卷

陳氏曰呂祖謙編蓋因觀歐陽公集考其歷仕歲月同官同朝之人畧著其事迹而集中詩文亦隨事附見非獨歐公本末而時事時賢之本末亦大畧可觀矣故以入傳記類

皇祐平蠻記二卷

陳氏曰殿中丞馮炳撰記儂智高事

孫威敏征南錄一卷

陳氏曰學士睢陽滕甫元發撰言平南之功皆本

孫沔元規狄青之至莫能出其右者余靖歸美於青非實也甫時通判潮州

唵廝囉傳一卷

陳氏曰不著作者

陝西聚米圖經五卷

陳氏曰閤門通事舍人雄州趙珣撰珣父振博州防禦使久在西邊珣訪得五路徼外山川道里康定二年為此書韓魏公經畧言於朝詔取其書召

見執政呂許公宋莒公言用兵以來策士之言以  
千數無如珣者擢涇原都監定川之敗死焉珣勁  
特好學恂恂類儒者人皆惜之

元豐平蠻錄三卷

陳氏曰金部員外郎知鳳翔府家安國撰記乞弟  
韓存寶事

元祐分疆錄三卷

陳氏曰直龍圖閣京兆游師雄景叔撰元祐初議

棄西邊四寨執政召師雄問之對曰先帝棄之可也主上棄之則不可且示弱夷狄反益邊患爭之甚力不聽卒棄之四寨者葭蘆米脂浮屠安疆也夏人以事出望外萌侵侮之心連年犯順皆如師雄所料此書前三卷記當時論辨本末後一卷行實不知何人作也是歲師雄被命行邊請以便宜行事夏人與鬼章謀寇熙河師雄說劉舜卿出師种誼遂破洮州擒鬼章以獻其功偉矣元祐諸老

固欲休兵息民師雄言既不行功復不賞殆以專  
反熙豐失於偏滯終成紹述之禍亦有以也師雄  
治平二年進士

青唐錄一卷

陳氏曰右班殿直李遠撰元符中取邈川青唐已  
而皆棄之遠紹聖武舉人官鎮洮奉檄軍前記其  
經歷見聞之實燦然可觀

交趾事迹十卷

陳氏曰知新州趙勰撰

占城國錄一卷

陳氏曰不著名氏

雞林類事三卷

陳氏曰不著名氏

政和大理入貢錄一卷

陳氏曰右迪功郎錢塘周邦撰其祖種為集賢修  
撰知桂州時歸明人黃璘招來大理國入貢詔種

考究其真偽種言偽妄不可憑乞依熙寧故事支馬價發還璘至京師力主其事種落職奉祠久而覺其詐乃改正復職知廣州

安南表狀一卷

陳氏曰紹興二十五年李天祚進貢自靖康二年以後至是始通也

邊和錄五卷

陳氏曰承議郎河東陳伯疆撰載胡世將承公宣



撫川陝事

建炎德安守禦錄三卷

陳氏曰郡丞東平劉荀子卿編次建炎初高密陳規  
元則守德安禦羣盜事跡功狀規後守順昌與劉  
錡共成却敵之功者也以樞密直學士知廬州而  
卒

淮西從軍記一卷

陳氏曰不著名氏記紹興十年金人敗盟淮西諸

帥守禦事

順昌破敵錄一卷

陳氏曰不著名氏記劉錡信叔守禦戰勝本末

滕公守台錄一卷

陳氏曰不著名氏睢陽滕膺子勤為台州戶曹方  
臘之亂仙居人呂師囊應之攻城甚急膺佐太守  
備禦卒全一城郡人德之至今廟食行狀事實聚  
見此篇膺後至直祕閣京西漕而終

二楊歸朝錄一卷

楊堯弼楊載紹興八年所與達蘭烏珠書時偽齊初廢也未有探報敵事數十條

逆臣劉豫傳一卷

陳氏曰楊堯弼等撰二楊事跡當考前錄題銜稱宣義郎迪功郎並為大總管府官屬此傳堯弼為右從事郎載為右迪功郎

許右丞行狀一卷

陳氏曰吏部員外郎許忻撰許公翰字崧老襄邑人為尚書右丞忻其弟也

李忠定行狀一卷

陳氏曰通判洪州李綸撰其兄丞相綱伯紀事狀葉適正則所作謚議附於後

翟忠惠家傳一卷

陳氏曰翟耆年伯壽述其父汝文公異事實忠惠者私謚也耆年實邢恕外孫

艾軒家傳一卷

陳氏曰莆田林成季述其季父工部侍郎光朝謙之事實

夾漈家傳一卷

所著書  
目附

陳氏曰莆田鄭翁歸述其父樵漁仲事迹翁歸年八十歲老貧不競頃佐莆郡時猶識之

葉丞相行狀一卷

陳氏曰閣學廬陵楊萬里廷秀撰丞相莆田葉顥

子昂乾道丁亥以冬雷罷相至建寧而薨

謝脩撰行狀墓誌一卷

陳氏曰昭武謝師稷務本奉使閩部有惠愛沒而民祠之行狀里人黃適景聲撰墓誌永嘉陳謙益之撰其廟曰昭應

朱侍講行狀一卷

陳氏曰奉議郎三山黃榦直卿撰其高第弟子且子壻也

紫陽年譜三卷

陳氏曰朱侍講門人通判辰州昭武李方子公晦  
撰

篤行事實一卷

陳氏曰丞相趙汝愚子直編其父善應彥遠事而  
羅願朱熹所撰行狀墓銘及諸賢哀詞題跋之屬  
萃為一編篤行者陳福公題其墓云爾呂太史跋  
語有云處者易持出者難工朱侍講取其意以為

銘所以勉其子之意深矣

趙丞相行實一卷 附錄二卷

陳氏曰知靜江府趙宗憲履常編集忠定長子也  
其一時諸賢祭文挽歌與嘉定更化之後昭雪誣  
枉改正史牒本末皆見附錄

趙忠定行狀一卷 續議一卷

陳氏曰知光州鄱陽柴中行與之撰其謚議允濟  
全之楊方子直所為也



倪文節言行錄三卷 遺奏誌狀碑銘謚議一卷

陳氏曰戶部郎中倪祖常子武輯其父尚書遺事  
行狀錫山蔣重珍良貴撰碑銘臨邛魏了翁華甫  
撰

趙華文行狀一卷

陳氏曰文林郎趙山李燾敬子撰忠定之子吏部

崇憲履常也

八朝名臣言行錄二十四卷

陳氏曰侍講朱熹撰以近代文集及傳記載本朝名臣言行掇取其要輯為此錄前五朝五十五人後三朝四十二人

中興志議忠錄三卷

陳氏曰龔頤正撰自建炎至紹興卒已上自李若水劉韜貴臣名士下及一婦人卒伍之微皆錄之孝史五十卷

太學博士新喻謝諤昌國撰集曰君紹五后德一

宗表五臣傳三十五文類二夷附一諤後至御史  
丞淳熙名臣樂易君子也

孝行錄三卷

陳氏曰京兆胡訥撰始得此書不知訥何人也所  
記多國初人已而知其為安定先生翼之之父仕  
為寧海節度推官

古今孝悌錄二十四卷

陳氏曰廬陵王紹圭唐卿撰

廉吏傳十卷

陳氏曰成都費樞伯樞撰自秦至唐凡百十有四  
人宣和乙巳為序

南陽先民傳二十卷

陳氏曰題南陽王襄元祐癸酉歲序所記鄧州人  
物自百里奚直不疑而下至唐范傳正韓翃凡一  
百六十人

典刑錄十二卷

陳氏曰茗溪吳宏編凡五十二門大畧於言行錄  
中抄出

近世厚德錄四卷

陳氏曰題百鍊真隱李元綱國紀編沈濬道原為  
作序

救荒活民書三卷

陳氏曰從政郎鄱陽董煗編進煗紹熙五年進士  
嘗知瑞安縣

仁政活民書二卷

陳氏曰秀州司戶會稽丁銳集

好還集一卷

陳氏曰秀水婁伯高元龍編報應之事為十門

先賢施仁濟世錄一卷

陳氏曰奉化丞山陰諸葛興編凡十門皆本朝諸

賢事實也

莆陽人物志三卷

陳氏曰知興化軍永嘉林紘文伯撰以圖志不叙人物故特為是編莆壤地褊小而人物特盛

臥遊錄一卷

陳氏曰呂祖謙撰晚歲病廢臥家取史傳所載古今人境勝處錄之時以宗少文臥遊之語實諸卷首

上庠錄十卷

陳氏曰光州助教呂榮義撰雜記京師太學故事

上庠後錄十二卷

陳氏曰三山周士貴撰記中興太學事頗疏畧

昭明太子事實二卷

陳氏曰知池州趙彥博富文編昭明廟食於池頗

著靈響元祐始賜額曰文孝

祠山家世編一卷

陳氏曰唐仁澤曾樵編輯廣德橫山神張王事跡

海神靈應錄一卷



陳氏曰永嘉貢士陸維則撰太守韓彥直子溫為之序初元祐中守直龍圖閣范岫夢海神曰吾唐李德裕也郡城東北隅海仙壇之上有廟初不知其為何代人岫明日往謁其像即夢中所見自是多響應然封爵訓詞惟曰海神而已

鄂國金佗粹編二十八卷 續編三十卷

陳氏曰岳珂撰

宋登科記三卷

鼂氏曰皇朝登科人名氏未詳何人所撰

唐宋科名分定錄三卷

鼂氏曰不題撰人元符間所著書也序云己卯歲得張君房所誌唐朝科場故事今續添五代及本朝科名分定事迄於李常寧云

大宋登科記三十二卷

陳氏曰洪适編始吳興郡學有鋟板不分卷第止述進士一科适始倣姚康錄制舉詞科自建隆庚

申迄紹興庚辰二萬三千六百人有奇為二十卷  
自後皆續書之

中興登科小錄三卷 姓類一卷

陳氏曰通判徽州江都李椿撰新安舊有登科記  
但逐榜全錄姓名而已椿家藏小錄自建炎戊申  
至嘉熙戊戌節次取名字鄉貫三代諱刊之後以  
韻類其姓凡一萬五千八百人有奇太守吳興倪  
祖常子武刻之以備前記之闕文

乘輅錄一卷

陳氏曰知制誥祁陽路振子發撰祥符中使契丹歸進此錄事見其傳

奉使別錄一卷

陳氏曰河南富弼彥國撰慶厯使契丹歸為語錄以進機宜事節則具於此錄又一本有兩朝往來書附於末

劉氏西行錄一卷

陳氏曰直昭文館保塞劉渙中章撰按康定二年  
朝廷議遣使通河西唃氏渙以屯田郎知晉州請  
行以十月十九日出界慶歷元年三月十日回泰  
州此其行紀也唃氏自此與中國通而元昊始病  
於牽制矣渙後擢刺史歷典數州至留後以工部  
尚書致仕

契丹講和記一卷

陳氏曰不著名氏載契丹初講和本末未有慶歷

增幣後北朝誓書

慶歷正旦國信語錄一卷

陳氏曰余靖慶歷三年使北所記

熙寧正旦國信錄一卷

陳氏曰天章閣待制竇卞熙寧八年使北所記

接伴送語錄一卷

陳氏曰集賢校理沈季長熙寧九年接伴送北使

耶律運所記

使遼見聞錄二卷

陳氏曰尚書膳部郎中李罕撰

宣和使金錄一卷

陳氏曰大常少卿安陸連南夫鵬舉弔祭阿固達

奉使所記時宣和六年

奉使雜錄一卷

陳氏曰紹興十二年何鑄使北所錄禮物名銜表

章之屬

館伴目錄一卷

陳氏曰無名氏紹興二十四年

隆興奉使審議錄一卷

陳氏曰左奉議郎雍希稷堯佐撰隆興二年編修  
官胡昉閣門祇候楊由義使金營軍前審議海泗  
唐鄧等事不屈而歸希稷其禮物官也所抗辯應  
對之語多出由義

攬轡錄一卷



陳氏曰吳郡范成大至能乾道六年使北所記聞見

北行日錄一卷

陳氏曰叅政四明樓鑰大防乾道己丑待次溫州教授以書狀官從其舅汪大猷仲嘉使北紀行

乾道奉使錄一卷

陳氏曰叅政諸暨姚憲令則乾道壬辰使北日記

奉使執禮錄一卷

陳氏曰進士鄭儼撰淳熙己酉中書舍人莆田鄭  
僑惠叔使北賀正會其主病篤欲令於閤門進國  
書僑不可已而殂遂回

使燕錄一卷

陳氏曰尚書戶部郎龍游余嶸景瞻撰嘉定辛未  
嶸使北賀生辰會有北師行至涿州定興縣而回

文獻通考卷一百九十九

欽定四庫全書

文獻通考卷二百

鄱陽馬端臨貴與著

經籍考二十七

史 偽史 霸史 史評 史抄

華陽國志十二卷 一百二十卷

鼂氏曰晉常璩撰華陽梁州地也記漢以來巴蜀人物呂微仲跋云漢至晉初四百載間士女可書

四百人亦可謂盛矣復自晉至周顯德僅七百載而史所紀者無幾人忠魂義骨與塵埃同歿何可勝數豈不重可歎哉

陳氏曰志巴蜀地理風俗人物及公孫述劉焉劉璋先後主以及李特等事跡末卷為序志云肇自開闢終乎永和三年

九州春秋九卷

陳氏曰晉司馬彪紹統撰記漢永州部之亂司冀

徐究青荆楊涼益幽凡盜賊僭叛皆紀之

淝上英雄小錄二卷

陳氏曰信都鎬撰所錄楊行密將吏有勲名者四十人其二十四人皆淝人餘諸道人又有僧道漁樵之屬十人錄其小事故名小錄

江淮異人錄二卷

陳氏曰吳淑撰所記道流俠客術士之類凡二十五人

南唐烈祖開基誌十卷

陳氏曰南唐滁州刺史王顏撰起天祐乙丑止昇

元癸卯合三十九年

南唐烈祖實錄十三卷

陳氏曰南唐史館修撰高遠撰闕第八第十二卷

遠又嘗為吳錄二十卷而徐鉉鄭文寶皆云開寶

中遠始緝昇元以來事書未成而疾焚其草故事

多遺落

江南錄十卷

鼂氏曰皇朝徐鉉等撰鉉等自江南歸朝奉詔集  
李氏時事王介甫嘗謂鉉書至亡國之際不言其  
君之過但以歷數存亡論之於春秋箕子之義為  
得也雖然潘佑以直見殺而鉉書佑死以妖妄殆  
與佑爭名且恥其善不及佑故匿其忠污之以罪  
耳若然豈唯厚誣忠臣其欺吾君不亦甚乎世多  
以介甫之言為然獨劉道原得佑子華所上其父

事跡畧與江南錄所書同乃知鉉等非欺誣也

陳氏曰徐鉉湯悅撰二人皆唐舊臣故太宗命之撰湯悅即殷崇義避宣祖諱并姓改焉

南唐近事二卷

鼂氏曰皇朝鄭文寶編記李氏三主四十年間雜事

陳氏曰起天福乙酉終開寶乙亥然泛記雜事實小說傳記之流耳



江南別錄四卷

鼂氏曰皇朝陳彭年撰偽吳偽唐四主傳也

江表志三卷

鼂氏曰鄭文寶撰序言徐鉉湯悅所錄事多遺落  
無年可編然前錄固為畧而猶以年月記事今此  
書亦止雜記如事實之類耳近事稱太平興國二  
年丁丑今稱庚戌者太中祥符三年

江南野史二十卷

鼂氏曰皇朝龍充撰凡八十四傳

江南館載二卷

陳氏曰不著姓名序言徐鉉始奉詔為江南錄其  
後王舉路振陳彭年楊億皆有書大槩六家皆不  
足以史稱而龍充為尤甚熙寧八年得鄭君所述  
於楚州其事迹有六家所遺或小異者刪落正是  
取百九十五段以類相從鄭君者莫知何人

南唐書三十卷

陳氏曰陽羨馬令撰序言其祖太傳元康世家金陵多知南唐故事未及撰次今纂先志而成之實崇寧乙酉其書畧備記傳體亦言徐湯之疎畧云新脩南唐書十五卷

陳氏曰寶謨閣待制山陰陸游務觀撰采獲諸書頗有史法

蜀桂堂編事二十卷

鼂氏曰偽蜀楊九齡撰雜記孟氏廣政中舉試事

載詩賦策題及知舉登科人姓氏且云科舉起於隋開皇前陋者謂唐太宗時非也

外史禱杙十卷

鼂氏曰皇朝張唐英次公撰稱王建孟知祥父子四世八十年比之公孫述輩最為久遠其間善惡有可為世戒者路振之書未備治平成此書以補其遺凡五代史及皇朝日歷所書皆畧之溫公修通鑑搜羅小說殆遍未嘗取此書蓋多舛舛如光

大至二年之類是也

陳氏曰唐英自號黃松子商英之兄也

前蜀記事二卷

陳氏曰偽蜀學士毛文錫平珪撰起唐明庚子盡  
天福甲子凡二十五年文錫唐太僕卿龜範之子  
十四登進士第八蜀仕建至判樞密院隨衍入洛  
而卒

後蜀記事十卷

陳氏曰直史館太常博士董淳撰惟記孟昶事

吳越備史九卷

陳氏曰吳越掌書記范垫巡官林禹撰按中興書目其初十二卷盡開寶三年後又增三卷至雍熙四年今書止石晉開運比初闕三卷

吳越備史遺事五卷

陳氏曰全州觀察使錢儼撰儼之弟也其序云備史亦其所作託名林范而遺名墜迹殊聞異見闕

漏未盡者復為是編時皇宋平南海之二年吳興  
西齋序蓋開寶五年也儼以三年代其兄偕刺湖  
州

閩中實錄十卷

陳氏曰周顯德中揚州永貞縣令蔣文惲記閩王  
審知父子及將吏儒士僧道事跡末亦畧及山川  
土物

閩王列傳一卷

陳氏曰祕書監晉江陳致雍撰二世七主通六十

年

閩王事跡一卷

陳氏曰不知何人作末稱光啓二年至天聖元年  
一百三十八年所記頗詳

三楚新錄三卷

陳氏曰知桂州修仁縣周羽冲撰上卷為湖南馬  
殷中卷為武陵周行逢下卷為荆南高季興



湖南故事十卷

陳氏曰不知作者記馬氏至周行逢事館閣書目作十三卷蓋為列傳十三篇其實十卷也文辭鄙甚

五國故事二卷

陳氏曰不知作者記吳蜀閩漢諸國事

九國志五十一卷

鼂氏曰皇朝路振子發撰雜記吳越唐前後蜀東

漢南漢閩楚凡九國

陳氏曰各為世家列傳凡四十九卷末二卷為北  
楚言高季興事張唐英所補撰

十國紀年四十二卷

鼂氏曰皇朝劉恕道原撰溫公序云渙之子也博  
學強記同修通鑑史事之紛錯難治者以諉恕宋  
次道知亳州家多書恕往借觀之目為之瞋性剛  
介初與王安石善及改新法言其非遂與之絕卒

年四十九所謂十國者一王蜀二孟蜀三吳四唐  
五吳越六閩七楚八南漢九荆南十北漢溫公又  
題其後云世稱路氏九國志在五代之史中最佳  
此書又過之以予考之長於考異同而拙於屬文  
其書國朝事皆曰宋而無所隱諱意者各以其國  
為主耳

天下大定錄一卷

陳氏曰殿中丞通判桂州王舉撰景祐間人始高

季興終劉繼元其所記疎畧獨江南稍詳本十卷  
今但為一卷恐非全書也

北廷雜記十卷

鼂氏曰契丹降人趙志忠撰記北廷雜事始於安  
巴堅迄邪律宗真李清臣云志忠仕北為中書舍  
人得罪來歸上此書及契丹地圖言敵中甚詳

陰山雜錄十六卷 契丹錄一卷

陳氏曰不著名氏莆田鄭氏書目云趙志忠撰歐

公歸田錄云志忠本華人自幼陷敵為人明敏在敵中舉進士至顯官歸國能述敵中君臣世次山川風物甚詳今觀此書可以槩見矣其首一卷名契丹錄

契丹疆宇圖一卷

陳氏曰不著名氏錄契丹諸夷地及中國所失地遼四京記

陳氏曰亦無名氏曰東京中京上京燕京

燕北雜錄五卷

西征寨地圖附

陳氏曰思卿武珪記嘉祐六年宮苑使知雄州趙  
其進於朝珪亦自契丹逃歸事見國史傳

匈奴須知一冊

鼂氏曰契丹歸明人田緯編次錄契丹地理官制

辨鴟錄一卷

陳氏曰不著名氏契丹譯語也凡八篇

敵庭須知一卷

陳氏曰左藏庫副使知安肅軍陳昉撰熙寧元年  
集賢校理胡穆為之序凡二十一條目

戴斗奉使錄二卷

鼂氏曰皇朝王曙撰景德三年為契丹主生辰使  
祥符二年為弔慰使所錄也

生辰國信語錄一卷

鼂氏曰皇朝寇瑊與康德興天聖六年使契丹賀  
其主生辰往返語錄并景德二年至天聖八年使

副姓名及雜議於後

張浮休使遼錄二卷

鼂氏曰皇朝元祐甲戌春張舜民被命為回謝大遼弔祭使鄭介為副錄其往返地理及話言也舜民字芸叟自號浮休居士

北遼遺事二卷

鼂氏曰不題撰人蓋遼人也記女真滅遼事序云遼國自安巴堅創業於其初德光恢廓於其後吞



滅諸蕃割據漢界南北開疆五千里東西四千里  
戒器之備戰馬之多前古未有子孫繼統二百三  
十餘年迨至天祚失御女真稱名十二年間舉國  
土崩古人謂得之難而失之易非虛言耳

陳氏曰燕山史愿撰一名金人亡遼錄

金敵節要一卷

一作三卷

鼂氏曰陷敵人所上也記金人初內侮止紹興十  
年共十六年事頗詳實

陳氏曰右從事郎究人張匯東卿撰宣和中隨父官保州陷敵十五年至紹興十年歸朝

金敵志二卷 又一卷

陳氏曰承奉郎張棣撰淳熙中歸明人記敵中事頗詳又一卷不著名氏似節畧張棣書其末又雜錄敵界事宜及敵亮以後事

松漠記聞二卷

陳氏曰徽猷閣直學士番陽洪皓光弼撰皓奉使

留敵中錄所聞雜事

征蒙記一卷

陳氏曰金人明威將軍登州刺史李大諒撰建炎  
鉅寇之子隨其父成降敵者也

偽楚錄二卷 偽齊錄二卷

陳氏曰並不著名氏

金人南遷錄一卷

陳氏曰稱偽著作郎張師顏撰初見此書疑非北

人語其間有曉然傳會者或曰華岳所為也近扣  
之汴人張總翼則云歲月皆抵牾不合益證其妄  
西夏須知一卷

鼂氏曰皇朝劉溫潤守延州日編錄偽境雜事

陳氏曰凡十五條目

蕃爾雅一卷

鼂氏曰不載著人姓名以夏人語依爾雅體譯以

華言

夏國樞要二卷

鼂氏曰皇朝孫異纂記夏虜兵屯會要土地肥磽  
井泉湧洄穀粟窖藏酋豪姓名位司存與夫城  
池之完缺風俗之所向編為兩帙上之朝

西域志十二卷

鼂氏曰唐僧元奘撰奘西遊天竺求佛書既歸記  
其所歷諸國風俗其自序云自黑領以西皆土著  
尚東左衽務田畜重財賄嫁娶無禮獨天竺則異

別記於後云或云元奘譯大總持寺僧辨機撰

雞林志三十卷

鼂氏曰皇朝崇寧中王雲編次崇寧中劉達吳拭使高麗雲為書記官既歸据輯其會見之禮聘問之辭類分為八門

陳氏曰自元豐創通高麗以後事實皆詳載之

海外使程廣記三卷

陳氏曰南唐如京使章僚撰使高麗所記海道及

其國山川事跡物產甚詳史虛白為作序稱已未  
十月蓋本朝開國前一歲也

高麗圖經四十卷

陳氏曰奉議郎徐兢明叔撰宣和六年路允迪傳  
墨卿使高麗兢為之屬歸上此書圖其形事為之  
說今所刊不復有圖矣兢鉉之後

南詔錄三卷

陳氏曰唐嶺南節度巡官徐雲虔撰乾符中邕中

遣雲虔使南詔所作上卷記山川風俗後二卷紀行及使事

雲南行記二卷

鼂氏曰唐韋齊休撰齊休長慶三年從韋審規使雲南記其往來道里及其見聞序謂雲南所以能為唐患者以開道越嶲耳若自黎州之南清溪關外盡斥棄之疆場可以無虞不然憂未艾也及唐之亡禍果由此本朝棄嶺州不守而遂無邊患以



此論之則齊休之言可不謂善哉

雲南志十卷

鼂氏曰唐樊綽撰咸通中南詔數寇邊綽為安南宣慰使纂入詔始末名號種族風俗物產山川險易疆境接聯聞於朝

至道雲南錄三卷

鼂氏曰皇朝辛怡顯撰蜀賊李順既平餘黨竄入雲南雷有終募怡顯招出之至道初歸因書其所

歷成此書

陳氏曰怡顯入雲南招李順餘黨因賜蠻酋告勅而遂為此錄天禧四年自序稱左侍禁知興化軍或云此書妄也余在莆田視壁記無怡顯名字恐或然

皇祐平蠻記一卷

鼂氏曰皇朝馮炳撰記儂智高叛朝廷遣狄青平之

南蠻錄十卷

鼂氏曰未詳撰人熙寧間交趾叛朝廷議討之或纂歷代南蠻事迹及便宜上之

諸蕃志二卷

陳氏曰福建提舉市舶趙汝适記諸蕃國及物貨所出

右偽史霸史

劉氏史通二十卷

鼂氏曰唐劉知幾撰知幾長安神龍間三為史官頗不得志乃以前代書史序其體法因習廢置掇其得失述所曲直分內外篇著為評議備載史策之要當時徐堅深重之云居史職者宜置坐右元宗朝詔其家錄進上讀而善之宋子京稱唐舊史之文猥釀不綱謂知幾工訶古人而拙於用已觀此書知子京之論不誣前世史部中有史抄類而集部中有文史類今世抄節之學不行而論說者

為多故自文史類內摘出論史者為史評附史部而廢史抄云

陳氏曰其著書亦博矣史通者漢封司馬遷後為史通子亦兼白虎通之義也

史通析微十卷

鼂氏曰唐柳璨昭之撰璨以劉子元史通妄誣聖哲評湯之德為偽迹論桀之惡為厚誣謗周公云不臣褒武庚以徇節其甚至於彈劾仲尼因討論

其舛謬共成五十篇蕭統云論則析理精微故以  
為名乾寧四年書成唐史云璨公綽族孫少孤貧  
好學著史通析微時或稱之起布衣至於相不四  
歲按唐紀相璨在天祐改元則書成猶未仕也

史例三卷

陳氏曰唐右補闕劉餗鼎卿撰知幾次子也

歷代史贊論五十四卷

鼂氏曰未詳撰人纂史記迄五代史臣贊論

歷代史辯志五卷

鼂氏曰未詳撰人亦有可觀者凡百許篇序謂人之志有甚微者不可不辯故以名書

通鑑釋文二十卷

陳氏曰司課司馬康公休撰溫公之子

通鑑釋文三十卷

陳氏曰左宣義郎眉山史炤見可撰馮時行為之序今考之公休之書大畧同而加詳焉蓋因其舊

而附益之也

通鑑前例一卷 修書帖一卷 三十六條四圖共一卷

陳氏曰司馬光記集修書凡例諸帖則與書局官屬劉恕范祖禹往來書簡也其曾孫侍郎俊季思哀於一篇又以前例分為三十六條而考其離合稽其授受推其甲子括其卷帙分為四圖

通鑑問疑一卷



陳氏曰高安劉義仲壯興纂集其父道原與溫公  
往復相繼者亦附修書帖後

讀史管見三十卷

陳氏曰禮部侍郎建安胡寅明仲以通鑑事備而  
義少故為此書議論宏偉嚴正間有感於時事其  
於熙豐以後接於紹興權姦之禍尤拳拳寓意焉  
晦庵綱目亦多取之

朱子語錄胡致堂議論英發人物偉然讀史管見

乃嶺表所作當時並無一冊文字隨行只是記憶所以其間有牴牾處

南軒言管見專為秦檜設豈有言天下之事而專於一人者先生曰儘有好處但好惡不相掩耳又曰致堂管見方是議論唐鑑議論弱又有不相應處前面說一項事未又說別處去

通鑑論篤三卷

陳氏曰侍講廣漢張栻敬夫撰取通鑑中言論之

精確者表而出之多或全篇少至一二語去取甚嚴可以見前輩讀書眼力之高

南北籌邊十八卷

臨江曾三英無愧撰周平園序畧曰南渡初士大夫日夜防守江淮計時右正言呂祉帥金陵與其屬吳若陳克著東南防守利便三卷上之事既詳實文亦條暢其後有尚書郎臨川吳曾著南北征伐編年二十三卷起三國終五代凡古今形勢師

旅勝負該貫無遺仍集當時君臣議論為分門事類一十二卷其相謀相應攻守通好可指諸掌視社之書益加詳焉今臨江曾君三英復為南北邊籌十八篇南之攻北其事有九諸葛亮紀瞻褚裒桓溫劉裕宋文帝陳顯達陳慶之吳明徹是也北之圖南其事亦九曹操魏明帝羊祜苻堅拓跋太武孝文元英邢巒北齊是也人為一論論指一事皆援昔以證今因迹以求心即成而究敗考古可

謂勤而用志可謂切矣

史記音義二十卷

陳氏曰唐宗賢館學士劉伯莊撰貞觀初奉勅講授采鄒誕生徐廣及隋柳顧言音義而為此書

史記索隱三十卷

鼂氏曰唐司馬貞撰據徐裴注糾正牴牾援據密緻如東坡辯宰我未嘗從田常為亂蓋本諸貞也  
陳氏曰採摭異聞釋文演注末二卷為述贊為三

皇本紀世號小司馬史記

附索隱史記一百三十卷

陳氏曰淳熙中廣漢張材介仲刊於桐川郡齋削去褚少孫所續而附以司馬貞索隱其後江陰耿秉直之復取所削者別刊之

史記正義二十卷

陳氏曰唐諸王侍讀張守節撰開元二十四年作序

崇文總目為漢書學者此最精博

陳伯宣注史記八十七卷

崇文總目唐陳伯宣撰因裴駰說有所未悉頗增損焉然多取司馬氏索隱以為已說今篇殘缺

遷史刪改古書異辭十二卷

陳氏曰倪思撰以遷史多易經語更簡嚴為平易體當然也然易辭而失其義書事而與經異者多不可以無考故為是編經之外與他書異者亦并

載焉

班馬異同三十五卷

陳氏曰倪思撰以班史仍史記之舊而多刪改大抵務趨簡嚴然或刪而遺其事實或改而失其本意因其異則可以知其筆力之優劣而又知作史述史之法矣

新校史記一百三十卷 新校前漢書一百卷 新校

後漢書九十卷 三史刊誤四十五卷



崇文總目皇朝張觀等校定初祕書丞余靖上言國  
子監所收史記漢書誤請行校正詔翰林學士張觀  
知制誥李淑宋祁與靖洎直講王洙於崇文院讐對  
靖等悉取三館諸本及先儒注解訓傳六經小說字  
林說文之類數百家之書以相叅校凡所是正增損  
數千言尤為精備逾年而上之靖等又自錄其讐校  
之說別為刊誤四十五卷

漢書問答五卷

崇文總目唐沈遵行撰采諸儒為漢書說者申釋其義有博聞之益然篇第頗差討求未獲闕劉傳以下諸篇

三劉漢書標注六卷

鼂氏曰皇朝劉敞原父弟攽貢父子奉世仲馮撰劉敞嘗跋其書尾云余為學官亳州故中書劉舍人實為守從容出所讀漢書示余曰欲作補注未能也然卷中題識已多公之子方山亞夫錄以相

示也

陳氏曰又本題公非先生刊誤其實一書公非貢父自號漢書自顏監之後舉世宗之未有能異其說者至劉氏兄弟始為此書多所辯正發明

呂氏前漢論三十卷

晁氏曰皇朝呂大忠晉伯撰予得其本於銅梁令呂肇修撰汲陵諸孫也

西漢發揮十卷

鼂氏曰皇朝劉涇巨濟撰涇蜀人

西漢決疑五卷

陳氏曰國子司業宛邱王述致君撰一曰失實二  
曰引古三曰異言四曰雜證五曰注釋

西漢史抄十七卷 兩漢博議十四卷

中興藝文志陳傅良撰指摘精要裨正闕誤如制度  
始末因革則條其大意遺其煩碎而一代之興衰治  
體人才紀綱風俗亦畧矣博議陳季雅所撰闕涉尤

大

東漢刊誤一卷

晁氏曰劉攽貢父撰攽序英宗讀後漢書見壑田  
字皆作懇字命國子監刊正攽為直講校正其謬  
誤不可勝算然此書世無善本率以已意定之治  
平三年奏御攽號有史學溫公修通鑑以兩漢事  
付之

兩漢博聞十二卷

鼂氏曰皇朝楊侃纂景德中侃讀兩漢書取其名數前儒解釋為此書以資涉獵者侃嘗編職林此亦其類也

兩漢刊誤補遺十七卷

陳氏曰國子博士吳仁傑斗南撰補三劉之遺也

三國人物論三卷

鼂氏曰皇朝楊祐甫撰蜀人

晉書指掌十二卷

鼂氏曰皇朝劉蕡編以晉書事實以類分為六十  
五門

唐書直筆新例四卷

鼂氏曰皇朝呂夏卿撰夏卿強記絕人預修新史  
此其在書局時所建明歐宋間有取焉如增入高  
祖字叔德之類是也

陳氏曰紀傳志各一卷末一卷摘舊史繁闕又為  
新例須知附於後畧舉名數如目錄之類記新書

比舊增減志傳及總類

唐書音訓四卷

鼂氏曰皇朝竇鞏撰新書多奇字觀者必資訓釋  
鞏問學精博發揮良多而其書時有改革者不知  
何人附益之也

唐書音義三十卷

鼂氏曰未詳撰人比竇氏書大畧同而稍簡乃析  
為三十卷



唐書辯證二十卷

一名糾謬

鼂氏曰皇朝吳縝撰縝字廷珍成都人仕至郡守  
數新書初修之時其失有八類其舛誤二十門凡  
四百餘事縝不能屬文多誤有詆訶如新書張九  
齡傳云武惠妃陷太子瑛遣官奴告之曰廢必有  
興公為援宰相可常處九齡奏之故卒九齡相而  
太子無患縝以為時九齡已相而太子竟以廢死  
以為新書似實而虛按史之文謂終九齡在相位

日太子得不廢也豈謂卒以九齡為相太子終無患乎初名糾謬其後改云辯證實一書也

王氏揮麈錄曰嘉祐中詔宋景文歐陽文忠諸公重修唐書時有蜀人吳縝者初登第因范景仁而請於文忠願預官屬之末上書文忠言甚懇切文忠以其年少輕佻拒之縝鞅鞅而去逮夫新書之成廼從其間指摘瑕疵為糾謬一書至元祐中縝遊宦蹉跎老為郡守與五代史纂誤俱刊行之紹

興中福唐吳仲實元美為湖州教授復刻於郡庠  
且作後序以謂鍼膏肓起廢疾杜預實為左氏之  
忠臣然不知續著書之本意也

陳氏曰其父師孟顯於熙豐此書紹聖初上之

注唐記十卷

鼂氏曰題曰樊先生而不詳其名近代人所著新  
書紀也

唐書列傳辯證二十卷

陳氏曰端明殿學士玉山汪應辰聖錫撰專政列傳不及紀志以元祐名賢謂列傳記事毀於鐫削暗於藻繪故隨事辯證之

新唐書畧三十五卷

陳氏曰呂祖謙授徒患新史難閱摘要抹出而門人抄之蓋節本之有倫理者也

唐史要論十卷

一作論斷二卷

晁氏曰皇朝孫甫之翰撰歐陽永叔司馬溫公蘇

子瞻稱其書議論精覈以為舊史所不及終於天章閣待制

朱子語錄司馬溫公書孫公唐史後云孫公之翰  
昔著此書甚自重惜嘗別緘其藁於笥必盟手然  
後啓之謂家人曰萬一有水火兵甲之急他貨財  
盡棄之此笥不可失也公私少間則增損改易未  
嘗去手其在江東為轉運使出行部亦以自隨過  
亭休止輒取修之會宣州有急變乘駟遽往不暇

挈以俱既行之後金陵大火延及轉運廨舍弟子  
察親負其筭避於沼中島上公在宣州聞之亟還  
入門問曰唐書在乎察對曰在乃悅餘無所問自  
壯年至於白首乃成亦未以示人文潞公執政嘗  
從公借之

又曰伯恭晚年謂人曰孫之翰唐論勝唐鑑要之  
也是切於事情只是大綱却不正了

陳氏曰甫以唐書煩冗遺畧多失體法乃修為唐

史用編年體自康定元年逮嘉祐元年成書七十五卷為論九十二首甫沒朝廷取其書留禁中其從子察錄以遺溫公而世亦罕見蜀有刻本未有之今惟諸論存焉

唐鑑二十卷

鼂氏曰皇朝范祖禹醇夫撰醇夫為溫公通鑑局編修官十五年分掌唐史以其所自得著成此書取武后臨朝二十一年繫之中宗其言曰此春秋

公在乾侯之義也雖得罪於君子有所不辭觀此則知醇夫之從公決非苟同者凡三百六篇

朱子語錄曰范太史唐鑑第一段論守臣節處不圓要做一書補之不曾做得范氏此文字草草之甚其人資質渾厚說得都如此平正只是疎多不入理終守臣節處於此亦須有些處置豈可便如此休了如此議論豈不為英雄所笑又曰唐鑑有疎處孫之翰唐論精細說得利害如身親歷之但



理不及唐鑑耳又曰唐鑑多說得散開無收煞如姚崇論擇十道使患未得人他自說得意不知范氏何故却貶其說又曰唐鑑白馬之禍歐公論不及此

又曰唐鑑有緩而不精確處如言租庸調及楊炎二稅之法說得都無收煞只云在於得人不在乎法有這般苟且處他是見熙寧間詳於制度故有激而言只那有激便不平直

陳氏曰元祐初上此書

唐史評三卷

鼂氏曰題曰適適先生不詳何人門人譙孝寧為

編次

五代史纂誤五卷 雜錄一卷

鼂氏曰皇朝吳縝撰凡二百餘事皆歐陽永叔新

五代史牴牾舛訛也按通鑑考異證歐陽史差誤

如莊宗還三矢事之類甚衆今此書皆不及之特

證其字之脫錯而已又善本未必皆然

陳氏曰宇文時中守吳興郡庠有二史板遂二書  
刻之後皆入國子監初郡人思溪王氏刻藏經有  
餘板以刊二史真郡庠中興監書多闕遂取其板  
以往今監本是也

典故辯疑二十卷

儒林郎主管尚書吏部架閣文字李大性撰淳熙  
十三年投進自為序畧曰仰惟皇朝聖明相紹明

良之懿著在青史坦然明白信以傳信而纓紳相  
屬佔畢益繁私史薦興說令蠶午朱紫苗莠混為  
一區熙朝盛美未免蒙翳請畧舉數端言之如梅  
堯臣碧雲駟非堯臣所撰孔平仲雜錄非平仲所  
述建隆遺事以王禹偁名而實非禹偁志怪集括  
異志倦遊錄以張師正名而實非師正涑水記聞  
雖出於司馬光而多所增益談叢雖出於陳師道  
而多所誤鑿以至王安石日錄蔡絛國史後補又

皆不足以取信儒者俱嘗言之而未之詳辯也矧  
其言者乎蓋嘗推其疇品為說滋夥數其差舛不  
見殫述雖云爝火之衆於大明何傷而微塵纖埃  
非全鏡所宜有也然則丹鉛點勘寤疑辯惑匪書  
生職與臣大懼私史踳駁或為正史之蠹輒擷其  
事而正之伏自忖念衡茅之下多未見之書樸櫟  
之材無竒特之見固不當自寘於五不韙之域以  
奸嚴誅而孤忠拳拳所欲辯明懷不能已非敢遠

纂昔人作指瑕糾謬之書以詒攻訶之誚獨取熙  
朝美事及名卿才大夫之卓卓可稱而其事為野  
史語錄所翳者辯而明之叅其歲月質其名氏爵  
位而考證焉其或傳聞異詞難以示信以意逆志  
雖知其非而未有曉然依據則姑置弗辨其所辯  
者必得所證而後為之說焉所辯凡二百條釐為  
二十卷名之曰典故辯疑

右史評史抄



文獻通考卷二百